


საქართველოს უზენაესი სასამართლოს მოსამართლის თანამდებობაზე ასარჩევად საქართველოს
პარლამენტისათვის წარსადგენი სამოსამართლო გამოცდილების მქონე მოსამართლეობის
კანდიდატის შეფასების ფორმა

მოსამართლეობის კანდიდატის გია ბერაიას შეფასების შედეგი:

მოსამართლეობის კანდიდატის შეფასება კეთილსინდისიერების კრიტერიუმის მიხედვით		
მოსამართლეობის კანდიდატი არ აკმაყოფილებს კეთილსინდისიერების კრიტერიუმს	<input type="checkbox"/>	
მოსამართლეობის კანდიდატი აკმაყოფილებს კეთილსინდისიერების კრიტერიუმს	<input type="checkbox"/>	
მოსამართლეობის კანდიდატი სრულად აკმაყოფილებს კეთილსინდისიერების კრიტერიუმს	<input checked="" type="checkbox"/>	
მოსამართლეობის კანდიდატის შეფასება კომპეტენტურობის კრიტერიუმის მიხედვით		
კრიტერიუმი	მიღებული ქულა	მაქსიმალური ქულა
სამართლის ნორმების ცოდნა	18	20
სამართლებრივი დასაბუთების უნარი და კომპეტენცია	20	20
წერის უნარი	20	20
ზეპირი კომუნიკაციის უნარი	14	15
პროფესიული თვისებები, მათ შორის, ქცევა სასამართლო დარბაზში	14	15
აკადემიური მიღწევები და პროფესიული წვრთნა	4	5
პროფესიული აქტივობები	4	5
ქულათა ჯამი	94	100

სახელი, გვარი:
თარიღი:

28.11.21



საქართველოს იუსტიციის უმაღლესი საბჭოს წევრი პაატა სილაგაძე

საქართველოს უზენაესი სასამართლოს მოსამართლის შესარჩევ კონკურსში მონაწილე
კანდიდატის, გია ბერაიას, შეფასების დასაბუთება

საქართველოს უზენაესი სასამართლოს მოსამართლის შესარჩევ კონკურსში მონაწილე კანდიდატის, გია ბერაიას, შეფასების დასაბუთების შედეგის პროცესში ვიხელმძღვანელებ „საერთო სასამართლოების შესახებ“ საქართველოს ორგანული კანონის 34¹-ე მუხლის მე-11 პუნქტით დადგენილი წესით.

ა. მოსამართლეობის კანდიდატის შეფასება კეთილსინდისიერების კრიტერიუმის მიხედვით;

მოსამართლეობის კანდიდატი სრულად აკმაყოფილებს კეთილსინდისიერების კრიტერიუმს, რადგან გია ბერაია არის კორექტული, თავშეკავებული და აქვს საკუთარი ემოციების მართვის უნარი. მას შესწევს უნარი კეთილსინდისიერად და პასუხისმგებლობის გრძნობით მოეკიდოს სამსახურებრივ, ფინანსურ თუ სხვა მოვალეობათა შესრულებას. (ქონებრივი დეკლარაციის შევსება, ბანკის წინაშე ნაკისრ ვალდებულებათა შესრულება და სატრანსპორტო საშუალების მართვის დარღვევისას დაკისრებულ ჯარიმათა დროულად გადახდა). აღსანიშნავია, რომ რეკომენდატორებისა და გამოკითხული რესპოდენტების მოსაზრებით გია ბერაია სრულად აკმაყოფილებს კეთილსინდისიერების კრიტერიუმებს.

ბ. მოსამართლეობის კანდიდატის შეფასება კომპეტენტურობის კრიტერიუმების მიხედვით;

სამართლის ნორმათა ცოდნის თვალსაზრისით, გია ბერაია სიღრმისეულად ფლობს მატერიალურ და საპროცესო კანონმდებლობას, რაც გამოვლინდა საჯარო მოსმენისას. გასაუბრებისას მისთვის დასმულ კითხვებზე სცემდა პასუხებს, რასაც დასაბუთებდა სამართლის ნორმათა მოშველიებით. კანდიდატს ჩაბარებული აქვს მოსამართლეობის საკვალიფიკაციო გამოცდა სისხლის სამართლის სპეციალიზაციით 05.11.2005 წელს. შესაბამისად გ. ბერაია მოცემული კრიტერიუმით, ჩემს მიერ შეფასდა 18 (თვრამეტი) ქულით.

სამართლებრივი დასაბუთების უნარისა და კომპეტენციის თვალსაზრისით, კანდიდატი ჩემს მიერ შეფასდა 20 (ოცი) ქულით, რამეთუ მას აქვს ხანგრძლივი პროფესიული, მათ შორის მოსამართლედ მუშაობის (15 წელზე მეტი) გამოცდილება. იგი ასევე გამოირჩევა ანალიტიკური აზროვნებისა და საკუთარი პოზიციის დასაბუთების უნარით.

კანდიდატის წერის უნარის შეფასებისას, ჩემს მიერ იგი შეფასდა ასევე 20 (ოცი) ქულით, რადგან მის მიერ წარმოდგენილი დოკუმენტის შესწავლისას, მივედი დასკვნამდე, რომ მას შესწევს სათანადო წერის უნარი. კანდიდატი კარგად განმარტავს და აანალიზებს სამართლებრივ ნორმებს. მასში ზედმიწევნით არის განხილული ფაქტობრივი და სამართლებრივი საკითხები. საყურადღებოა, რომ ტექსტი აგებულია გამართულად და მკითხველისათვის ადვილად აღსაქმელად.

ზეპირი კომუნიკაციის უნარით კანდიდატის შეფასებისას, ჩემს მიერ იგი შეფასდა 14 ქულით, რადგან მას აქვს ნორმალური მეტყველების უნარი და იგი გამოირჩევა სხვისი აზრის მოთმინებით მოსმენის კულტურით. საჯარო მოსმენისას გ. ბერაია ახერხებდა საკუთარი შეხედულებების ღიად, ნათლად და გასაგები ენით გადმოცემას.

პროფესიული თვისებების, მათ შორის, სასამართლო სხდომის დარბაზში ქცევის კრიტერიუმით შეფასებისას მივედი დასკვნამდე, რომ გია ბერაია გამოირჩევა შრომისმოყვარეობითა და მიზანდასახულობით. აგრეთვე ფლობს საქმის სათანადოდ მომზადების, გადაწყვეტილებათა მიღებისა და დამოუკიდებელი აზროვნების უნარს. მაღალია მის მიერ განხილულ საქმეთა პროცენტული მაჩვენებელი, კერძოდ - ვადის დაცვით 94,3%, ხოლო ვადის დარღვევით 5,7%. გადაწყვეტილების მომზადების ვადების დაცვის თვალსაზრისით, ვადის დაცვით 98,6%, ვადის დარღვევით 1,4%. ხოლო გასაჩივრებულ გადაწყვეტილებათა სტაბილურობა: უცვლელი 71,4%; შეცვლილი 28,6%. საანგარიშო პერიოდში (1045 დღე) მოსამართლეს დასრულებული აქვს 1590 საქმე (ყველა კატეგორიის), დღეში საშუალოდ 1.5 საქმემდე ოდენობით. ამ კრიტერიუმით შეფასებისას კანდიდატი შეფასდა 14 (თოთხმეტი) ქულით.

აკადემიური მიღწევებისა და პროფესიული წვრთნისას მხედველობაში იქნა მიღებული კანდიდატის მიერ ახალი ცოდნისა და უნარების შეძენის მიზნით, ტრენინგებში მიღებული მონაწილეობის მაჩვენებელი კერძოდ - პედაგოგიკასა და ფსიქოლოგიაში არასრულწლოვანთა მართლმსაჯულება - სემინარი, ადამიანთ ვაჭრობის წინააღმდეგ ბრძოლა - სემინარი, სამოქალაქო საქმეზე გადაწყვეტილების ჩამოყალიბება - სემინარი, არასრულწლოვანთა მართლმსაჯულება - სემინარი. შესაბამისად კანდიდატმა ამ კრიტერიუმით შეფასებისას მიიღო 4 (ოთხი) ქულა.

რაც შეეხება პროფესიულ აქტივობას, შესაძლებელია ითქვას, რომ გია ბერაიას მონაწილეობა აქვს მიღებული მართლმსაჯულების საკითხებზე გამართულ ღონისძიებებში, თუმცა იგი ამჟამად არ არის დაკავებული სამეცნიერო და პედაგოგიური საქმიანობით, გია ბერაია ლექციების კურსს კითხულობდა 2010-2011 წლებში ახალციხის სახელმწიფო სასწავლო უნივერსიტეტში. შესაბამისად ამ კრიტერიუმით შეფასებისას მან დაიმსახურა 4 (ოთხი) ქულა.

ამდენად, მოსამართლეობის კანდიდატმა, გია ბერაიამ, კომპეტენტურობის კრიტერიუმის მიხედვით შეფასებისას საერთო ჯამში მიიღო 94 ქულა 100 ქულიდან.

დასაბუთება

უზენაესი სასამართლოს მოსამართლეობის კანდიდატის შეფასება კეთილსინდისიერების კრიტერიუმის მახასიათებლების მიხედვით.

„საერთო სასამართლოების შესახებ“ საქართველოს ორგანული კანონის თანახმად, იმის დასადგენად თუ რამდენად აკმაყოფილებს კანდიდატი გია ბერაია კეთილსინდისიერების კრიტერიუმს, მოცემულ დასკვნაში წარმოდგენილი და გაანალიზებულია მისი შეფასება აღნიშნული კრიტერიუმის თითოეულ მახასიათებელთან მიმართებით. კერძოდ - პიროვნული კეთილსინდისიერება და პროფესიული სინდისი; დამოუკიდებლობა, მიუკერძოებლობა და სამართლიანობა; პიროვნული და პროფესიული ქცევა; პიროვნული და პროფესიული რეპუტაცია; აგრეთვე ფინანსური ვალდებულებები.

ყურადსაღებია, რომ კეთილსინდისიერების კრიტერიუმით გია ბერაიას შეფასება დაეყრდნო კანდიდატის შესახებ მოძიებულ ინფორმაციას, რომლის გამოთხოვაც მოხდა სხვადასხვა უწყებიდან, რომელნიც ფლობდნენ ინფორმაციას კანდიდატის შესახებ. კერძოდ - საქართველოს შინაგან საქმეთა სამინისტროდან მოწოდებულ ინფორმაციას ადმინისტრაციული

სამართალდარღვევების შესახებ, სს „კრედიტინფო საქართველოდან“ მიღებულ სრულ პერსონალურ საკრედიტო ინფორმაციას, საქართველოს ფინანსთა სამინისტროს შემოსავლების სამსახურიდან მიღებულ ცნობას შემოსავლების შესახებ, საჯარო სამსახურის ბიუროდან მოწოდებულ დეკლარაციას ქონებრივი მდგომარეობის შესახებ, კანდიდატის სამუშაო ადგილიდან ინფორმაციას დისციპლინური სამართალწარმოების შესახებ, გია ბერაიას დახასიათების მიზნით მასთან სამსახურებრივ და პირად ურთიერთობაში მყოფ პირთაგან შევსებულ სპეციალური ფორმის რეკომენდაციებსა და კითხვარებს. აქვე აღსანიშნავია, რომ გია ბერაიას შეფასებისას გათვალისწინებულ იქნა მის მიერ საჯარო მოსმენისას გამოვლენილი თვისებები და მახასიათებლები.

აღნიშნულ ინფორმაციაზე დაყრდნობით, კანდიდატთან დაკავშირებით მისი პიროვნული კეთილსინდისიერებისა და პროფესიული სინდისის მახასიათებლების თაობაზე შესაძლოა ითქვას, რომ გია ბერაიას პირად თვისებებს გამოკითხული რესპოდენტები იცნობენ კარგად; რესპოდენტების აზრით კანდიდატი სრულად აკმაყოფილებს კეთილსინდისიერების კრიტერიუმებს. გამოარჩევენ კანდიდატის შრომისმოყვარეობას, დამოუკიდებლობას, თავდაჯერებულობას, პრინციპულობას, საქმისადმი ერთგულებასა და ა.შ. საჯარო მოსმენისას გია ბერაიამ დატოვა თავაზიანი და მოკრძალებული პიროვნების შთაბეჭდილება. კანდიდატი გამოირჩევა პასუხისმგებლობის მაღალი გრძნობით, სამსახურებრივ თუ სხვა სახის მოვალეობებს (ფინანსურს და სხვა სახის ვალდებულებებს) ასრულებს პირნათლად. საგზაო მოძრაობის წესების დარღვევისთვის დაკისრებული ჯარიმები გადახდილი აქვს პირნათლად. ეს კი მიუთითებს იმის შესახებ, რომ კანდიდატს სწორად აქვს შეგნებული და გააზრებული როგორც პირადი ასევე პროფესიული მოვალეობები.

დამოუკიდებლობის, მიუკერძოებლობისა და სამართლიანობის დამახასიათებლად უნდა აღინიშნოს რეკომენდატორების მითითება მისი კეთილსინდისიერების შესახებ. კომპეტენტურობის კრიტერიუმით რესპოდენტები კანდიდატს აფასებენ ძალიან კარგად. რაც შეეხება გია ბერაიას პოლიტიკურ ან სხვა ნიშნით მიუკერძოებლობის საკითხს, უნდა აღინიშნოს, რომ კანდიდატი არ ყოფილა არც ერთი პოლიტიკური პარტიის წევრი/მხარდამჭერი და მითუმეტეს შემომწირველი, საჯარო მოსმენისასაც არ დაუფიქსირებია რომელიმე პარტიის ან პოლიტიკური ორგანიზაციის მიმართ საკუთარი მიკერძოების საკითხი.

პიროვნული და პროფესიული ქცევის მახასიათებელთან დაკავშირებით კანდიდატის შესახებ მოძიებული ინფორმაციის თანახმად იგი იცავს ეთიკის წესებს, კოლეგებთან და სხვა პირებთან ურთიერთობისას არის კორექტული და გამოირჩევა მოსამართლის მაღალი წოდების შესაბამისი ქცევითა და იმიჯით. საჯარო მოსმენისას ასევე ნათელი გახდა, რომ გ. ბერაია არის ზრდილობიანი და თავდაჭერილი თუმცა გასაუბრებისას მას პასუხების გაცემისას ემჩნეოდა ემოციურ მღელვარება. ასევე უნდა მიექცეს ყურადღება იმ ფაქტს, რომ კანდიდატის მიმართ დისციპლინური დევნა ან სისხლისსამართლებრივი წარმოება არ დაწყებულა არასდროს და თავად სასამართლოში წარმართულ დავებში მხარედ წარმოდგენილი არ ყოფილა.

პიროვნული და პროფესიული რეპუტაციის თვალსაზრისით გია ბერაიას დამახასიათებელ თვისებებსა და პროფესიულ მიღწევებზე აღნიშნავენ რეკომენდატორები და გამოკითხული პირები, რომელნიც მას ახასიათებენ დადებითად. იუსტიციის უმაღლესი საბჭოს საზოგადოებასთან და მედიასთან ურთიერთობის მენეჯერის ინფორმაციის თანახმად, გია ბერაიას მიერ განხილული საქმეების თაობაზე ინტერნეტ სივრცეში გვხვდება ინფორმაცია კერძოდ - დაიწერა ე.წ. მიწების საქმის, ასევე ახალციხის მერიის ყოფილი თანამშრომლის, ოქროს

მედლებისა და „რუსთავჭესის“ საქმეების შესახებ. გაშუქდა გია ბერაიას უვადო მოსამართლედ განწესება. იურიდიულ წრეებთან ურთიერთობის ხასიათთან და ხარისხთან დაკავშირებით კი მოძიებული ინფორმაციის საფუძველზე მხოლოდ ის შეიძლება ითქვას, რომ გია ბერაია ლექციების კურსს კითხულობდა ახალციხის სასწავლო უნივერსიტეტში.

ფინანსურ მახასიათებლებთან დაკავშირებით შესაძლოა ითქვას, რომ გია ბერაიას აქვს დადებითი საკრედიტო ისტორია და სახელმწიფოს წინაშე დავალიანება არ აქვს, თუმცა აქვს მიმდინარე სესხი. კანდიდატს საკუთრებაში აქვს ორი ბინა (61.4 კვ.მ და 58.3 კვ.მ), ბორჯომში; არასაცხოვრებელი ფართი (255.81 კვ.მ - 2.18%), ქ.ქუთაისში, საცხოვრებელი სახლი (220 კვ.მ), ჩოხატაურში; მიწის ნაკვეთი (1000 კვ.მ), ჩოხატაურში და მსუბუქი ავტომანქანა. მეწარმეთა და არასამეწარმეო იურიდიულ პირთა რეესტრში რეგისტრირებული არ არის და უძრავი ქონების რეესტრში არსებული ინფორმაცია შესაბამისობაშია ქონებრივი მდგომარეობის დეკლარაციასთან. ამდენად, კანდიდატის ფინანსური ვალდებულებების შემოწმებისას გამოიკვეთა, რომ არ არსებობს მისი ქონებრივი ინტერესების მართლმსაჯულების ინეტრესებთან დაპირისპირების საფუძველი, რამაც შესაძლოა საფრთხის ქვეშ დააყენოს მოსამართლის მიუკერძოებლობა.

შესაბამისად, დასკვნის სახით, შესაძლებელია ითქვას, რომ არ გამოკვეთილა გარემოება, რომელიც ეჭვქვეშ დააყენებდა კანდიდატის კეთილსინდისიერებას. შესაბამისად მივიჩნევ, რომ იგი სრულად აკმაყოფილებს აღნიშნულ კრიტერიუმს.

უზენაესი სასამართლოს მოსამართლეობის კანდიდატის შეფასება კომპეტენტურობის კრიტერიუმის თვალსაზრისით

„საერთო სასამართლოების შესახებ“ საქართველოს ორგანული კანონის თანახმად, კომპეტენტურობის კრიტერიუმის საფუძველზე კანდიდატ გია ბერაიას შეფასებისას მხედველობაში მივიღე ხსენებული კრიტერიუმის თითოეული მახასიათებელი. კერძოდ - სამართლებრივი ნორმების ცოდნა, სამართლებრივი დასაბუთების უნარი და კომპეტენცია, წერის უნარი, ზეპირი კომუნიკაციის უნარი პროფესიული თვისებები, მათ შორის ქცევა სასამართლო სხდომის დარბაზში, აკადემიური მიღწევები და პროფესიული წვრთნა, პროფესიული აქტივობა. კომპეტენტურობის კრიტერიუმით კანდიდატის შეფასება დაეყრდნო კანდიდატის შესახებ მოძიებულ ინფორმაციას, მათ შორის მის მიერ წარმოდგენილ სამართლებრივ დოკუმენტებსა და საჯარო მოსმენის შედეგად შექმნილ შთაბეჭდილებას.

სამართლებრივი ნორმების ცოდნის თვალსაზრისით გასათვალისწინებელია გია ბერაიას ცოდნა სამოქალაქო და ადმინისტრაციული სამართლის ნორმათა თვალსაზრისით. საჯარო მოსმენისას ნათელი გახდა მისი ცოდნა საქართველოს კონსტიტუციის, საქართველოს საკანონმდებლო სიახლეებისა და საკონსტიტუციო სასამართლოს გადაწყვეტილებების, აგრეთვე საქართველოს უზენაესი სასამართლოს პრაქტიკისა და ადამიანის უფლებათა ევროპული სასამართლოს გადაწყვეტილებების თვალსაზრისით. აღსანიშნავია, რომ მას ჩაბარებული აქვს მოსამართლეობის საკვალიფიკაციო გამოცდა სისხლის სამართლის მიმართულებით.

საქართველოს იუსტიციის უმაღლესი საბჭოს თითოეული წევრის მიერ კანდიდატის შესახებ მოძიებული ინფორმაციის შესწავლისა და გია ბერაიასთან საჯარო მოსმენისას (იხ. გ. ბერაიასთან საჯარო მოსმენის სხდომის ვიდეოჩანაწერი) კანდიდატს საბჭოს წევრთა მიერ

დაესვა არაერთი სამართლებრივი თუ ზოგადი ხასიათის შეკითხვა საიდანაც ირკვევა, რომ იგი არის კორექტული და თავშეკავებული. სამართლებრივ საკითხებზე მსჯელობისას, კანდიდატი გამოირჩეოდა ლოგიკური მსჯელობისა და ანალიზის უნარით. იგი ანვითარებდა სამართლებრივ და დასაბუთებულ მსჯელობას. თუმცა მსჯელობისას ეტყობოდა ოდნავ მღელვარება.

გია ბერაიას მიერ სამართლებრივი დასაბუთების, კომპეტენციისა და წერის უნართან დაკავშირებით შესაძლებელია ითქვას, რომ მას აქვს ხანგრძლივი პროფესიული, მათ შორის 15 წელზე მეტი სამოსამართლო საქმიანობის გამოცდილება. კანდიდატი ამჟამად არის თბილისის სააპელაციო სასამართლოს ადმინისტრაციულ საქმეთა პალატის მოსამართლე და მის მიერ წარმოდგენილი სამართლებრივი დოკუმენტის (თბილისის სააპელაციო სასამართლოს ადმინისტრაციულ საქმეთა პალატის 2020 წლის 21 ივლისის განჩინება საქმე N3ბ/771-20 (დავის საგანი - ადმინისტრაციული აქტის ბათილად ცნობა). შესწავლის საფუძველზე შესაძლებელია ითქვას, რომ იგი გამოირჩევა სათანადო წერის უნარით. კანდიდატი მის მიერ მიღებულ გადაწყვეტილებაში ნათლად განმარტავს და აანალიზებს სამართლებრივ ნორმებს. მასში თანმიმდევრულად არის განხილული როგორც ფაქტობრივი, ასევე სამართლებრივი საკითხები. ტექსტი აგებულია გამართულად და მკითხველისთვის ადვილად აღსაქმელია. გადაწყვეტილებაში მნიშვნელოვანი და თვალსაჩინო გრამატიკული შეცდომებიც არ გამოვლენილა.

გია ბერაიას ზეპირი კომუნიკაციის უნართან დაკავშირებით აღსანიშნავია, რომ მას აქვს ვერბალური კომუნიკაციის დამაკმაყოფილებელი უნარი და გამოირჩევა სხვისი აზრის მოსმენის თვისებით. შესაბამისად კანდიდატი ახერხებდა საჯარო მოსმენაზე საკუთარი შეხედულებების ნათლად და მკაფიოდ გადმოცემას.

გია ბერაიას პროფესიული თვისებების, მათ შორის სასამართლო სხდომის დარბაზში ქცევასთან დაკავშირებით, კანდიდატის შესახებ მოძიებული ინფორმაციითა და მის წარმოებაში არსებულ საქმეთა განხილვის სტატისტიკური ინფორმაციის თანახმად, შესაძლებელია ხაზი გაესვას კანდიდატის შრომისმოყვარეობას, მიზანდასახულობას, გულმოდგინებას, პროდუქტიულობასა და საქმის ჯეროვნად მომზადების, მხარეებთან სათანადო მოქცევისა და სასამართლო სხდომის კარგად წარმართვის უნარებს. კანდიდატს ასევე აქვს სტრესული სიტუაციის მართვისა და რთულ სიტუაციაში სხვისი დახმარების გარეშე სწორი გადაწყვეტილების მიღების უნარი. რაც შეეხება სტატისტიკურ მაჩვენებლებს 2018 წლის იანვრიდან - 2021 წლის იანვრის პერიოდის შესწავლით, დგინდება კანდიდატის შრომისმოყვარეობა, რამეთუ ერთობ მაღალია, როგორც საქმეთა განხილვის, ასევე გადაწყვეტილებათა დაწერისა და განხილულ საქმეთა ძალაში დატოვების მაჩვენებელი.

რაც შეეხება კანდიდატის აკადემიურ მიღწევებს, პროფესიულ წვრთნასა და პროფესიულ აქტივობებში, ხაზგასასმელია მისი აქტიურობა პროფესიული ზრდისა და ცოდნის გაღრმავების თვალსაზრისით, რამეთუ მას მონაწილეობა აქვს მიღებული სხვადასხვა ხასიათის ტრენინგში რაზეც ზემოთ მაქვს მითითებული. გია ბერაია ამჟამად არ არის დაკავებული სამეცნიერო ან პედაგოგიური საქმიანობით თუმცა ეწეოდა პედაგოგიურ მოღვაწეობას.

შეჯამება

ზემოაღნიშნულის გათვალისწინებით, კანდიდატ გია ბერაიასთან დაკავშირებით შესაძლებელია ითქვას, რომ იგი სრულად აკმაყოფილებს კეთილსინდისიერების კრიტერიუმს და კომპეტენტურობის კრიტერიუმის თითოეული მახასიათებლის გათვალისწინებით კანდიდატის შეფასებისას გათვალისწინებული იქნა მისი ცოდნა, კომპეტენცია, გამოცდილება, პროფესიული თვისებები, უნარ-ჩვევები და სხვა მნიშვნელოვანი მახასიათებლები. ხსენებული ინფორმაციის შეჯერებისა და შეფასების საფუძველზე დადგინდა, რომ მის მიერ დაგროვილ ქულათა ჯამი მაქსიმალური 100 ქულიდან შეადგენს 94 ქულას. ამდენად, კანდიდატის ცოდნის, პროფესიული გამოცდილებისა და მის მიერ გამოვლენილი უნარ-ჩვევების გათვალისწინებით, მივიჩნევ, რომ მას შესწევს უნარი ღირსეულად შეასრულოს უზენაესი სასამართლოს მართლმსაჯულების განხორციელების უმაღლესი და საბოლოო ინსტანციის საკასაციო სასამართლოს მოსამართლისათვის დაკისრებული რთული და საპასუხისმგებლო საქმიანობა.

საქართველოს იუსტიციის უმაღლესი საბჭოს წევრი

პაატა სილაგაძე

20.11.21.

